

E bala a cuminza lora:

Ken si y ken no por bira ministro o parlamentario

ORANJESTAD (AAN) Pueblo di Aruba ayera atrobe tabata riba abao cu e noticianan confuso cu tabata ser plama tur caminda, cu ministro Glenbert Croes no por bira ministro pasobra Ministerio Publico lo tin un investigacion andando contra e ministro relaciona cu e escandalo di DOPV.

Na Curacao señor Nelson Monte no tabata ministeri-
able pasobra Seguridad Nacional a desconsheha Gobernador di Antiyas pa huramenta señor Monte.

Awor ta na Aruba e batata a cuminza kima den panchi awor cu supuestamente tin problema cu huramentacion di Glenbert Croes como ministro den e proximo gobierno.

Den e racha di entreguismo cu Henny Eman di partido AVP a comete cu Hulanda, el a firma aña pasa un acuerdo cu ministro Voorhoeve di Hulanda, caminda reglanan a ser poni ken si y ken no por bira mandatario na Aruba.

Si Glenbert Croes no por bira ministro pasobra tin investigacion andando contra su persona, anto varios otro politico na Aruba tambe no por bira ministro y tambe varios parlamentario por bay cas numa pasobra nan tambe tin manteca riba nan cabez?

No por pone regla pa uno y tur otro por desvia di reglanan cu supuestamente mester garantiza calidad den gobernacion.

Calidad mester conta pa tur y no pa un solo mandatario.

Si mester bay investiga ken a haci kico den pasado y ken tin vinculonan comercial directo o indirecto o otro vinculonnan inacceptable, anto ta poco ministro o parlamentario ta keda disponible pa pais Aruba su parlamento y gobierno.

Tin por lo menos 4 pa 6 politico cu tin negoshi directo o indirecto y pa nan e reglanan nobo cu Henny Eman a firma cu Hulanda no ta conta?

Cuminzando for di 1986, tabata tin un racha largo di escandalo y investigacionnan cu te awe no a ser finaliza door di Ministerio Publico cu diripiente den menos cu dos biaha 24 ora ta haci investigacion riba tur hende pa saca afor cu aparentemente Glen-

bert Croes so no por bira ministro.

Beta Hotel, Cargo Zaak, donacion di Spartaco Ghini, Oranges, Radisson Hotel, escandalo di Lotto pa Deporte, Barco Daniel Leo, Kluis di Arubahuis, escandalo encuan-
to tereno di cas di Zwinkels, escandalo di departamento DVZ cu tabata regla permitnan pa extranhero, KB riba cabez di ministro, escandalo di piscina olimpico, otorgamento di tereno, contractnan di WEB cu NIB cu a ser acusa di a laba placa na Hulanda, donacionnan haci di parti di Sinbad, donacion di Coastal pa renovacion di Sportpark, Sporthal na Santa Cruz, actualmente examen medico pa tur politico, comportacion publico di varios politico cu a ser haya burachi riba caya y den lugarnan nocturno, mal uzo di aparato gubernamental pa metanan partidista, e famoso Lista di narco traficantenan cu te awe Ministerio Publico no a duna cuenta di dje, etc etc

ta laga un saldo atras cu no ta mucho positivo pa mayoria politico cu kier bira ministro o parlamentario.

Ta cuanto parlamentario por keda sinta riba e stoel

dushi cu ta duna e salario baro despues cu nan pasa e screening cu Henny supuestamente a regla pa tur hende?

Manera cu cos ta pinta, no lo keda nada otro cu eleccion

nobo y si ta eleccion mester bin, anto cada partido riba nan mes mester cuminza haci nan screening di nan candidatonan prome cu nan traha lista.